

*Contestabeli è stà cassadi alla dita monstra.*

Ferazin da Brexa,  
Bernardo da Vilmercà,  
Pochi panni,  
Andrea da Coregio,  
Otavian Vayla  
Hercule Poeta,  
Bernardin da Trani,  
Bortolamio Avogaro,  
Fabricio Tadino,  
Bernardo Manara,  
Batista di Santo Angelo,  
Rubin da Perosa,  
Cesar da Martinengo,  
Alexandro Colorgno,  
Anteo Gigante,  
Zuan da Riete,  
Stefano Fanteaguzo,  
Baldisera Azale,  
Antonio Scolaro.

319 *Copia de una lettera di Famagosta, scritta per Andrea Sanson a dì 19 Outubroio 1526, drizata a sier Alvise Loredan qu. sier Luca.*

Per far partecipe vostra magnificentia di le nove habiamo perfino al presente di, vi mando la copia di una lettera, la qual, uno mio fiol se trova in Adna, la qual non obstante che la sia un poco tribulada et con amaritudine, *tamen* del tutto el me bisogna soportar in patientia, perchè semo nati in questo misero mondo per haver affanni. Il tenor di la qual lettera è di questo tenor :

*Laus Deo, 1526, in Adena.*

*Observandissime Pater.*

A dì 6 del presente son zonto in Adna, in el qual luogo ho trovato molte tribulation per esser tutto questo paese sottosopra, per essersi levato uno certo signor di la parte del Soffi nominato Tud Zarzardich, el qual ha fato testa et si se atrova de haver gran seguiti, et perfino al presente se atrova di haver da zerca 50 milia persone a cavallo et ben in ordine. El qual, da Zaman Basan del Gran Turco fiolo di uno suo barba, el qual fece taiar el padre di questo Gran Turco soldan Selim quando ebbe la signoria et da la madre

sua fo transfurado et menato dal Soffi, se levò et fece testa et va contra el Gran signor turco; con el qual se atrova esser uno fiolo de Ali Dolut qual fo taiado la testa per Sayt bassà, et prese do soi fioli et menoli in Constantinopoli, el terzo scampò et andò dal Sophi, el qual se atrova esser con il presente signor Turzarchag sopraditto. El bassà del Cugno nominato Schender Pasog fece da 20 milia persone a cavallo et 1500 schioppi, li qual sono li primi bassà che sono ne la Anatolia et nella Caramania, et li primi apresso la Porta del Signor. El signor di Adana nominato Zamatan og Paypol ha fato 3 milia persone a cavallo, et el signor de Tarsos nominato Saran og ha fatto 4 milia persone a cavallo, et el signor de Sis nominato Schander bey 200 persone a cavallo, li qual tutti se hanno reduto ne la campagna de Sivas, et de li se hanno desfidà ditto et fezeno fatti d'arme per modo che restò vincidor el sopraditto Turzagarg el qual ha taiado a pezi tutti. Non è scapolado altro che el signor de Adena con doi feride mortal, l'una per mezo de la costa et l'altra in el viso, el qual è tornado con 300 cavalli feriti et mal conditionadi et stà per morire. El bassà del Cugno lo ha preso vivo et li fè taiar la testa; tutto il resto morite in el fatto d'arme. Si dice esser stà taiado 42 flamberi, restando vincidor di tutto quel paese, et prese la terra de Sivas la qual se dice esser una gran terra, et hora el tira a la volta di Aleppo. El signor de Damasco con il resto dei signori di la Soria se hanno redutto in Aleppo, et de li lo aspetano perchè i non vol campizar con esso per esser pochissimi, da zerca 5 in 6 milia persone; et poi vedeno esser odiati da li populi et maxime da arabi. Sopra di queste montagne se ha levado uno capo de lari nominato Abel Asus, el qual ha fatto una asunada da zerca 300 cavalli, et andò per sachizar la Jaza, et la ventura volse che in quella notte piovete una gran pioza, et essendosi afirmado in uno caxale fori de la Jaza da zerca meza zornada, et uno altro signor lo hebbe per spia, et veder non veder, feze 200 cavalli de quelli caxali circumvicini soi, et andò a l'improvisa con tutte le pioze, et saltoli trovandoli a dormire, et taioli tutti, per modo che non scapulò anima nata de quelli. Et hora se dice come li parenti de li morti hanno fatto tre capi, li qual vanno asonando zente per vegnir a sachizar Adena et la Jaza. Et il vice signor di Adena ha sunado da zerca 600 cavalli et mille pedoni, et ogni notte el stà a l'erta fori di la terra per non esser